

LIGJI NR. 08/L-167**PËR PROKURORIN E SHTETIT**

Kuvendi i Republikës së Kosovës,

Në mbështetje të nenit 65 (1) të Kushtetutës së Republikës së Kosovës,

Miraton:

LIGJ PËR PROKURORIN E SHTETIT**KAPITULLI I
DISPOZITAT E PËRGJITHSHME****Neni 1
Qëllimi**

Ky ligj rregullon organizimin, juridiksionin, funksionimin, kompetencat dhe detyrat e Prokurorit të Shtetit.

**Neni 2
Fushëveprimi**

Dispozitat e këtij ligji zbatohen për Prokurorin e Shtetit.

**Neni 3
Përkufizimet**

1. Shprehjet e përdorura në këtë ligj kanë këtë kuptim:

- 1.1. Prokurori i Shtetit** - institucion i pavarur me autoritet dhe përgjegjësi për ndjekjen penale të personave të akuzuar për ndonjë vepër penale ose për ndonjë vepër tjetër, sikurse është rregulluar me ligj.
- 1.2. Kryeprokurori i Shtetit** - është kreu i Zyrës së Prokurorit të Shtetit.
- 1.3. Kryeprokurori** – kreu i zyrës së prokurorit, duke përjashtuar Kryeprokurorin e Shtetit.
- 1.4. Kushtetuta** - Kushtetuta e Republikës së Kosovës.
- 1.5. Prokuror Special** – prokurori i shtetit që shërben në Prokurorinë Speciale, siç përcaktohet në legjisllacionin përkatës.
- 1.6. Këshilli** - Këshilli Prokurorial i Kosovës;
- 1.7. Aftësitë menaxheriale** - kuptim i sistemeve për menaxhimin e resurseve dhe financave, aftësi në planifikim dhe organizim dhe gatishmëri për delegimin e përgjegjësive, si dhe aftësi për t'i lidhur gjërat në kontekst më të gjerë, si dhe artikulimi i planeve afatgjatë të organizatës.
- 1.8. Integritet personal** - ndershmëri intelektuale, morale, sjellje profesionale, ndjenjë të ndershmërisë, besueshmërisë dhe sigurisë, sjelljet me përkushtim dhe pajtueshmëri ndaj ligjit dhe kodeve të përgjithshme të mirësjelljes.
- 1.9. SMIL** – Sistemi për menaxhimin informativ të lëndëve.

KAPITULLI II PARIMET THEMELORE

Neni 4

Pavarësia dhe paanshmëria e Prokurorit të Shtetit

1. Prokurori i Shtetit është institucion i pavarur që ushtron funksionet e veta në mënyrë të paanshme.
2. Prokurori i Shtetit dhe secili prokuror para ligjit siguron trajtim të barabartë, objektiv dhe pa paragjykime për të gjithë personat, pa asnjë diskriminim, duke respektuar të drejtat dhe liritë themelore të njeriut të përcaktuara me Kushtetutë, legjislacionin në fuqi dhe konventa ndërkombëtare.
3. Është e kundërligjshme për cilindo person fizik apo juridik që të ndërhyjë, pengojë, ndikojë apo të përpiqet të ndërhyjë apo ndikojë te Prokurori i Shtetit, gjatë kryerjes së funksioneve prokuroriale lidhur me cilindo hetim, procedurë apo lëndë individuale.

Neni 5

Ushtrimi i funksioneve prokuroriale

1. Në Republikën e Kosovës funksionet prokuroriale ushtrohen vetëm nga prokurorët e autorizuar dhe kompetent të shtetit dhe prokurorët specialë siç përcaktohet në Ligjin përkatës për Prokurorinë Speciale.
2. Prokurori është i autorizuar të iniciojë hetime penale, të paraqesë aktakuzë, të zhvillojë ndjekjen penale apo të kryejë detyra apo funksione të tjera prokuroriale që janë në përputhje me legjislacionin në fuqi.

Neni 6

Përbërja shumetnike dhe barazia gjinore e Prokurorit të Shtetit

Prokurori i Shtetit pasqyron përbërjen shumetnike të Republikës së Kosovës dhe respekton parimet e barazisë gjinore.

Neni 7

Efikasiteti i Prokurorit të Shtetit

Prokurori i Shtetit ushtron funksionet e veta në mënyrë efikase dhe efektive dhe në pajtueshmëri me Kushtetutën, legjislacionin në fuqi dhe parimet e pranuar ndërkombëtarisht për mos-diskriminim, të drejtat e njeriut dhe liritë themelore.

KAPITULLI III KOMPETENCAT DHE PËRGJEGJËSITË E PROKURORËVE

Neni 8

Kompetencat dhe përgjegjësitë e prokurorëve

1. Kompetencat dhe përgjegjësitë e prokurorëve përfshijnë:
 - 1.1. ushtrimin e funksioneve prokuroriale në mënyrë të pavarur, të drejtë, objektive dhe të paanshme dhe të sigurohen që të gjithë personat trajtohen në mënyrë të barabartë para ligjit;
 - 1.2. zbatimin e standardeve më të larta të kujdesit gjatë kryerjes së funksioneve zyrtare;

- 1.3. sjellje të ndershme dhe profesionale si në jetën personale ashtu edhe profesionale dhe bazuar në legjislacionin në fuqi dhe kodin e etikës profesionale;
- 1.4. ruajtjen e nderit dhe dinjitetit të Prokurorit të Shtetit;
- 1.5. mbrojtjen e të drejtave ligjore të viktimave, dëshmitarëve, dhe të pandehurve;
- 1.6. ndërmarrjen e veprimeve të nevojshme juridike për zbulimin e veprave penale dhe të autorëve të krimit si dhe hetimin dhe ndjekjen me kohë të veprave penale;
- 1.7. marrjen e vendimeve mbi iniciimin, vazhdimin apo ndërprerjen e procedurës penale ndaj personave të dyshuar apo të akuzuar për kryerjen e veprave penale;
- 1.8. ngritjen e aktakuzave dhe përfaqësimin e tyre para gjykatës;
- 1.9. ushtrimin e mjeteve të rregullta dhe të jashtëzakonshme juridike kundër vendimeve gjyqësore;
- 1.10. bashkëpunimin me policinë, gjykatat dhe institucionet e tjera;
- 1.11. ndërmarrjen e të gjitha veprimeve të tjera të përcaktuara me ligj.

Neni 9 **Veprimtaritë parandaluese**

Prokurori i Shtetit bashkëpunon me institucionet shtetërore dhe subjektet e tjera publike dhe private në aktivitete lidhur me edukimin e shoqërisë me qëllim të ngritjes së njohurisë për legjislacionin përkatës në fuqi dhe parandalimit të veprave penale.

Neni 10 **Bashkëpunimi ndërkombëtar**

1. Kryeprokurori i Shtetit, në bashkëpunim me Ministrinë e Drejtësisë, përcakton protokole dhe procedura për të avancuar bashkëpunimin me autoritetet e shteteve të tjera sa i përket ndjekjeve penale, përmes shkëmbimit të informacionit dhe mënyrave të tjera në përputhje me legjislacionin në fuqi dhe marrëveshjet ndërkombëtare lidhur mes Kosovës dhe vendeve të tjera.
2. Kryeprokurori i Shtetit bashkëpunon me autoritetet dhe subjektet ndërkombëtare.

Neni 11 **Marrëdhëniet me publikun**

1. Prokurori i Shtetit i ofron publikut rregullisht informacione lidhur me veprimtaritë e saj.
2. Pavarësisht nga paragrafi 1 i këtij neni, Prokurori i Shtetit nuk ofron asnjë informacion qoftë drejtpërdrejtë apo tërthorazi që do të zbulonte sekretet zyrtare, do të rrezikonte një hetim apo procedurë penale në zhvillim e sipër, do të dëmtonte integritetin, dinjitetin, sigurinë dhe të drejtat mbi privatësinë e cilitdo person, apo që do të shkelte të drejtat e të miturve.

Neni 12 **Ndarja e lëndëve**

1. Ndarja e lëndëve për prokuror bëhet në mënyrë elektronike përmes sistemit elektronik.

2. Në raste specifike, ndarja e lëndëve bëhet në mënyrë manuale, siç parashihet me aktin përkatës nënligjor të nxjerrë nga Këshilli.

KAPITULLI IV STRUKTURA ORGANIZATIVE, JURIDIKSIONI DHE KOMPETENCAT E PROKURORIT TË SHTETIT

Neni 13 Kompetencat dhe Organizimi i Prokurorit të Shtetit

1. Prokurori i Shtetit në Republikën e Kosovës organizohet dhe funksionon në përputhje me këtë ligj, si dhe me Ligjin përkatës për Prokurorinë Speciale.

2. Prokurori i Shtetit është kompetent për ndjekjen penale të personave të dyshuar për vepra penale, ushtrimin e mjeteve juridike nga kompetenca e tij, si dhe kryen punë të tjera të përcaktuara me ligj.

3. Dispozitat ligjore, me të cilat përcaktohet kompetenca lëndore dhe territoriale e gjykatave, zbatohen përshtatshmërisht edhe për kompetencën lëndore dhe territoriale të Prokurorit të Shtetit, para të cilave kryejnë autorizimet e veta pranë këtyre gjykatave, përveç nëse me këtë ligj përcaktohet ndryshe.

4. Prokurorin e Shtetit e përbëjnë:

4.1. Zyra e Kryeprokurorit të Shtetit;

4.2. Prokuroria e Apelit, e cila përbëhet nga Departamenti i Përgjithshëm, Departamenti për të Mitur dhe Departamenti për Krime të Rënda;

4.3. Prokuroria Speciale, siç është e përcaktuar me ligjin përkatës për Prokurorinë Speciale; dhe

4.4. Prokuroritë Themelore të përbëra nga Departamenti i Përgjithshëm, Departamenti për të Mitur dhe Departamenti për Krime të Rënda.

5. Funksionet prokuroriale në zyrën e Kryeprokurorit të Shtetit i kryen Kryeprokurori i Shtetit dhe prokurorët në Zyrën e Kryeprokurorit të Shtetit, në pajtim me legjislacionin përkatës në fuqi.

6. Funksionet prokuroriale në Prokurorinë e Apelit dhe në Prokuroritë Themelore i kryejnë kryeprokurorët dhe prokurorët e këtyre prokurorive, në pajtim me legjislacionin përkatës në fuqi.

Neni 14 Zyra e Kryeprokurorit të Shtetit

1. Zyra e Kryeprokurorit të Shtetit është instanca më e lartë e Prokuroritë të Shtetit me kompetencë në tërë territorin e Republikës së Kosovës, siç përcaktohet me këtë ligj.

2. Selia e Zyrës së Kryeprokurorit të Shtetit është në Prishtinë.

3. Në kuadër të Zyrës së Kryeprokurorit të Shtetit funksionon edhe Zyra për Mbrojtje dhe Ndhimë Viktimave si zyrë e pavarur për ofrimin e shërbimeve për viktimat e krimit gjatë procedurave ligjore dhe përfaqësimin e interesave të tyre në sistemin e drejtësisë penale.

4. Mandati, struktura, funksionimi dhe organizimi i Zyrës për Mbrojtje dhe Ndhimë Viktimave rregullohet me akte nënligjore të miratuara nga Këshilli.

Neni 15

Prokuroria e Apelit

1. Prokuroria e Apelit vepron dhe përfaqëson lëndët në Gjykatën e Apelit si dhe ka kompetenca të tjera të përcaktuara me ligj.
2. Prokuroria e Apelit ka juridiksion në tërë territorin e Republikës së Kosovës.
3. Me pëlqimin e Kryeprokurorit të Prokurorisë së Apelit, prokurori që ka vepruar në shkallë të parë në një lëndë konkrete mund ta shoqërojë dhe ndihmojë prokurorin e Prokurorisë së Apelit në seancën e shkallës së dytë në mbrojtjen apo kundërshtimin e ankesës.
4. Selia e Prokurorisë së Apelit është në Prishtinë.

Neni 16

Prokuroria Speciale

1. Prokuroria Speciale është organ prokurorial i specializuar, me juridiksion në tërë territorin e Republikës së Kosovës, siç përcaktohet me legjislacionin në fuqi.
2. Juridiksioni territorial, fushëveprimi, kompetenca lëndore e Prokurorisë Speciale, funksionet procedurale dhe përbërja e Prokurorisë Speciale përcaktohen me Ligjin përkatës për Prokurorinë Speciale.

Neni 17

Prokuroria Themelore

1. Prokuroria Themelore ka juridiksion mbi të gjitha lëndët e shkallës së parë, përveç nëse është paraparë ndryshe me ligj.
2. Prokuroria Themelore ka juridiksion territorial të përcaktuar si në vijim:
 - 2.1. Prokuroria Themelore në Prishtinë, për territorin e Gjykatës Themelore të Prishtinës, siç përcaktohet në Ligjin përkatës për Gjykatat;
 - 2.2. Prokuroria Themelore në Ferizaj, për territorin e Gjykatës Themelore të Ferizajit, siç përcaktohet në Ligjin përkatës për Gjykatat;
 - 2.3. Prokuroria Themelore në Gjakovë, për territorin e Gjykatës Themelore të Gjakovës, siç përcaktohet në Ligjin përkatës për Gjykatat;
 - 2.4. Prokuroria Themelore në Gjiilan, për territorin e Gjykatës Themelore të Gjiilanit, siç përcaktohet në Ligjin përkatës për Gjykatat;
 - 2.5. Prokuroria Themelore në Mitrovicë, për territorin e Gjykatës Themelore të Mitrovicës siç përcaktohet në Ligjin përkatës për Gjykatat;
 - 2.6. Prokuroria Themelore në Pejë, për territorin e Gjykatës Themelore të Pejës, siç përcaktohet në Ligjin përkatës për Gjykatat;
 - 2.7. Prokuroria Themelore në Prizren, për territorin e Gjykatës Themelore të Prizrenit siç përcaktohet në Ligjin përkatës për Gjykatat.

Neni 18 **Themelimi i zyrave tjera**

1. Kryeprokurori i Shtetit mund t'i paraqet kërkesë Këshillit për themelimin e zyrave të tjera në kuadër të sistemit prokurorial.
2. Në rast së Këshilli miraton themelimin e një zyre tjetër, atëherë do t'i paraqesë Kuvendit të Republikës së Kosovës propozim për plotësim buxhetor.

Neni 19 **Bashkëpunëtorët profesional të Prokurorive dhe Praktikantët**

1. Për kryerjen e përgjegjësive të tyre, çdo prokuror duhet të ketë së paku një bashkëpunëtor profesional.
2. Këshilli Prokurorial i Kosovës me akt nënligjor përcakton procedurën e përzgjedhjes dhe emërimit, kriteret, të drejtat dhe detyrimet për bashkëpunëtorë profesional dhe praktikantë.

KAPITULLI V **KOMPETENCAT DHE PËRGJEGJËSITË E KRYEPROKURORIT DHE** **KRYEPROKURORËVE, ZËVENDËSKRYEPROKURORIT DHE ZËVENDËS-** **KRYEPROKURORËVE TË SHTETIT DHE UDHËHEQËSVE TË DEPARTAMENTEVE**

Neni 20 **Kompetencat dhe Përgjegjësitë e Kryeprokurorit të Shtetit**

1. Kryeprokurori i Shtetit është kreu i zyrës së Prokurorit të Shtetit dhe ka këto kompetenca dhe përgjegjësi:
 - 1.1. është përgjegjës për menaxhimin dhe përfaqësimin e Prokurorit të Shtetit dhe të strukturave të prokurorive, të cilat e përbëjnë Prokurorinë e Shtetit;
 - 1.2. është anëtar sipas detyrës zyrtare i Këshillit;
 - 1.3. i rekomandon Këshillit emërimin e Zëvendës-Kryeprokurorit të Shtetit, nga radhët e prokurorëve në Zyrën e Kryeprokurorit të Shtetit;
 - 1.4. mund t'i paraqesë Këshillit propozim për shkarkim të Zëvendës-Kryeprokurorit të Shtetit dhe Kryeprokurorit të prokurorisë përkatëse;
 - 1.5. ka kompetencë ekskluzive për lëndët në shkallë të tretë pranë Gjykatës Supreme dhe mbi të gjitha lëndët që përfshijnë mjetet e jashtëzakonshme juridike;
 - 1.6. nxjerr me shkrim rregulla, udhëzime dhe vendime të përgjithshme të detyrueshme për të gjithë kryeprokurorët dhe prokurorët me qëllim të zbatimit të ligjshmërisë, ngritjes së efikasitetit dhe zbatimit unik të praktikave dhe legjislacionit;
 - 1.7. Mbikëqyr zbatimin e udhëzimeve dhe akteve tjera të përcaktuara me legjislacionin në fuqi;
 - 1.8. i propozon Këshillit për miratim rregullat mbi veprimtarinë dhe udhëheqjen e evidencës në Prokurorin e Shtetit;
 - 1.9. mund t'u jap udhëzime me shkrim Kryeprokurorit të një prokurorie apo cilido prokuror të ndonjë prokurorie për punën konkrete, me qëllim të zhvillimit efikas të procedurës ose

për arsye tjera të rëndësishme kur konsideron se ka neglizhencë, paaftësi profesionale apo mos zbatim të ligjshmërisë. Udhëzimet duhet të jenë të arsyetuara dhe të mos e cenojnë pavarësinë funksionale dhe profesionale të prokurorëve;

1.10. mund të kërkojë raporte apo informata tjera me shkrim lidhur me progresin, gjendjen apo zgjidhjen e lëndëve të caktuara. Kërkesa e tillë duhet të bëhet me shkrim;

1.11. bën vlerësimin e punës së Kryeprokurorëve dhe prokurorëve në Zyrën e Kryeprokurorit të Shtetit;

1.12. kërkon vlerësimin e jashtëzakonshëm të Kryeprokurorëve dhe prokurorëve në Zyrën e Kryeprokurorit të Shtetit;

1.13. kryen edhe punë të tjera të përcaktuara me ligj.

2. Kryeprokurori i shtetit me vendim me shkrim, me qëllim të zhvillimit efikas të procedurës ose për arsye tjera të rëndësishme, mund të marrë nën juridiksion cilindo rast në cilindo prokurori në Republikën e Kosovës, ose ta ricaktojë atë te një prokurori tjetër.

3. Vendimi me shkrim nga paragrafi 2 i këtij neni, duhet të arsyetojë së paku edhe neglizhencën, paaftësinë profesionale ose konfliktin e interesit.

Neni 21

Kompetencat dhe Përgjegjësitë e Kryeprokurorëve

1. Kryeprokurori ka këto kompetenca dhe përgjegjësi:

1.1. udhëheqë me punën dhe përfaqëson prokurorinë për të cilin është emëruar;

1.2. është përgjegjës për punën e prokurorisë dhe për punën e vet për çështje administrative i përgjigjet Këshillit, ndërsa për çështje operative i përgjigjet Kryeprokurorit të Shtetit;

1.3. i rekomandon Këshillit Zëvendës-Kryeprokurorin e tij;

1.4. mund t'i paraqesë Këshillit propozim për shkarkim të Zëvendës-Kryeprokurorit të tij;

1.5. mund të merr përsipër funksionin e ndjekjes penale në një lëndë konkrete që i është caktuar një prokurori vartës në atë prokurori me pëlqimin paraprak të Kryeprokurorit të Shtetit. Marrja e rastit duhet të bëhet me vendim të arsyetuar dhe të bëhet përshtatshmërisht për rrethanat e përcaktuara në nenin 20, paragrafi 2 dhe 3 të këtij ligji;

1.6. mund të kërkojë raporte me shkrim apo informata nga prokurori vartës;

1.7. mund të delegojë disa kompetenca tek vartësit e tij;

1.8. mund t'u jap udhëzime me shkrim prokurorëve të një prokurorie që udhëheq, me qëllim të zbatimit të ligjshmërisë, ngritjes së efikasitetit dhe zbatimit unik të praktikave dhe legjislacionit. Udhëzimet duhet të jenë të arsyetuara, të mos cenojnë pavarësinë funksionale dhe profesionale të prokurorëve. Nëse prokurori e konsideron udhëzimin si të kundërligjshëm ose në kundërshtim me ndërgjegjshmërinë e tij, ai ka të drejtë të kërkojë vendimin e Kryeprokurorit të Shtetit. Vendimi i Kryeprokurorit të Shtetit është me shkrim dhe përfundimtar.

- 1.9. bën vlerësimin e punës së prokurorëve të prokurorisë që udhëheq;
- 1.10. kërkon vlerësimin e jashtëzakonshëm të performancës së prokurorëve të prokurorisë që udhëheq;
- 1.11. kryen edhe punë të tjera të përcaktuara me ligj.

2. Përveç kompetencave dhe përgjegjësive të përcaktuara në paragrafin 1 të këtij neni, Kryeprokurori i Prokurorisë Speciale si dhe Kryeprokurori i Prokurorisë Themelore në Prishtinë i propozon Këshillit caktimin dhe shkarkimin e udhëheqësve të departamenteve siç përcaktohet me këtë ligj.

Neni 22

Kompetencat dhe përgjegjësitë e Zëvendës-Kryeprokurorit të Shtetit dhe Zëvendës-Kryeprokurorëve

1. Në rast të mungesës apo përfundimit të mandatit të Kryeprokurorit të Shtetit, përkatësisht Kryeprokurorit të Prokurorisë, Zëvendës-Kryeprokurori i Shtetit, përkatësisht Zëvendës-Kryeprokurori ushtron të gjitha detyrat dhe përgjegjësitë e Kryeprokurorit të Shtetit, përkatësisht Kryeprokurorit të Prokurorisë të përcaktuar me legjislacionin në fuqi.
2. Kur Kryeprokurori i Shtetit përkatësisht Kryeprokurori i Prokurorisë është në detyrë, Zëvendës-Kryeprokurori i Shtetit, përkatësisht Zëvendës - Kryeprokurori e ushtron funksionin e prokurorit.

Neni 23

Udhëheqësit e Departamenteve

1. Në Departamentin e Përgjithshëm, Departamentin për të Mitur dhe Departamentin për Krime të Rënda të Prokurorisë Themelore në Prishtinë, si dhe në departamentet e Prokurorisë Speciale caktohen Udhëheqës të Departamenteve.
2. Udhëheqësi i Departamentit nga paragrafi 1 i këtij neni ka këto kompetenca dhe përgjegjësi:
 - 2.1. është përgjegjës për rregullimin e brendshëm dhe funksionimin e departamentit;
 - 2.2. sipas kërkesës, ofron këshilla dhe rekomandime në raport me lëndët për prokurorët;
 - 2.3. i raporton Kryeprokurorit të Prokurorisë për punën e departamentit që udhëheq;
 - 2.4. kujdeset për mbarëvajtjen e procesit të vlerësimit të punës së prokurorëve për periudha gjashtë (6) mujore dhe një (1) vjeçare;
 - 2.5. ushtron funksionin e prokurorit sipas legjislacionit përkatës në fuqi.

KAPITULLI VI

KUSHTET DHE KUALIFIKIMET PËR EMËRIM, TRAJNIMI FILLESTAR DHE PËRFUNDIMI I MANDATIT TË PROKURORËVE TË SHTETIT

Neni 24

Kushtet e përgjithshme

1. Kandidati për emërim për prokuror të shtetit, duhet t'i plotësojnë këto kushte:

- 1.1. të jetë shtetas i Republikës së Kosovës;
- 1.2. të ketë diplomën e fakultetit juridik të vlefshëm në Kosovë;
- 1.3. të ketë të kryer provimin e jurisprudencës të pranuar sipas ligjit të aplikueshëm në Kosovë;
- 1.4. të ketë reputacion të lartë profesional dhe integritet personal;
- 1.5. të mos jetë i dënuar për veprë penale, përveç veprave penale të kryera nga pakujdesia;
- 1.6. të ketë së paku tre (3) vite përvojë pune profesionale në fushën juridike, pas diplomimit;
- 1.7. të ketë kaluar provimin për prokuror, në pajtim me kushtet dhe procedurat e përcaktuara me rregullore të veçantë të miratuar nga Këshilli;
- 1.8. të mos ketë aktakuzë të ngritur, përjashtimisht atyre të ngritura për vepra penale të kryera nga pakujdesia.

2. Për qëllime të këtij neni përvoja në fushën juridike përfshinë përvojën në çështje juridike në institucionet dhe organizatat vendore dhe ndërkombëtare, përvojën si noter dhe përmbarues privat.

Neni 25 Trajnimi fillestar

1. Pas emërimit nga Presidenti i Kosovës, prokurorët e emëruar, me përjashtim të atyre që kanë përvojë paraprake si prokuror, i nënshtrohen trajnimit fillestar të organizuar nga Akademia e Drejtësisë. Trajnimi fillestar duhet të zgjasë dymbëdhjetë (12) muaj, në bazë të legjislacionit në fuqi.
2. Gjatë trajnimit fillestar, prokurorëve mund t'u caktohen raste nën mbikëqyrjen e mentorit.
3. Prokurorët e emëruar do të vlerësohen pas rezultateve të trajnimit fillestar, në bazë të dispozitave relevante të ligjit. Periudha e trajnimit fillestar do të zgjatet për ata prokurorë që dështojnë ta përfundojnë në mënyrë adekuate trajnimin fillestar, siç është përcaktuar nga Akademia e Drejtësisë.

Neni 26 Kualifikimet e veçanta

1. Përveç plotësimit të kushteve minimale, kandidatët për emërim për prokuror të shtetit, me qëllim të emërimit apo avancimit në prokurori të caktuar duhet të kenë kualifikimet si në vijim:
 - 1.1. për të ushtruar funksionin e prokurorit në Departamentin për Krime të Rënda apo në Departamentin për të Mitur në Prokurorinë Themelore, prokurori duhet të ketë mandat të përhershëm si prokuror dhe vlerësim pozitiv të performancës;
 - 1.2. për të ushtruar funksionin e prokurorit në Prokurorinë e Apelit, prokurori duhet të ketë së paku tri (3) vite përvojë si prokuror në Departamentin për Krime të Rënda apo Departamentin për të Mitur të Prokurorisë Themelore ose në Prokurorinë Speciale të Republikës të Kosovës si dhe vlerësim pozitiv të performancës;
 - 1.3. për të ushtruar funksionin e prokurorit në Prokurorinë Speciale të Republikës

së Kosovës, prokurori duhet t'i plotësojë kushtet për të punuar si prokuror në Departamentin për Krime të Rënda, si dhe të ketë vlerësim pozitiv të performancës. Periudha e ushtrimit të funksionit të prokurorit në Prokurorinë Speciale, të caktuar sipas dispozitave të këtij Ligji, llogaritet si përvojë e prokurorit në Departamentin e Krimeve të Rënda në Prokurorinë Themelore;

1.4. për të ushtruar funksionin e prokurorit në Zyrën e Kryeprokurorit të Shtetit, prokurori duhet të ketë së paku shtatë (7) vite përvojë si prokuror, prej tyre së paku tre (3) vite në Prokurorinë e Apelit, Prokurorinë Speciale apo Departamentin për Krime të Rënda ose Departamentin për të Mitur të prokurorive themelore si dhe vlerësim pozitiv të performancës.

Neni 27 **Përfundimi i mandatit**

1. Mandati i prokurorit përfundon në këto mënyra:
 - 1.1. me dorëheqje;
 - 1.2. shkarkim;
 - 1.3. vdekje;
 - 1.4. me arritjen e moshës së pensionimit;
 - 1.5. nëse nuk rrimërohet me mandat të përhershëm.

KAPITULLI VII **KRITERET E PËRZGJEDHJES DHE MANDATI I KRYEPROKURORIT DHE** **KRYEPROKURORËVE, ZËVENDËSKRYEPROKURORIT DHE ZËVENDËS-** **KRYEPROKURORËVE TË SHTETIT DHE UDHËHEQËSVE TË DEPARTAMENTEVE**

Neni 28 **Kriteret për Kryeprokuror të Shtetit dhe Kryeprokurorë**

1. Kandidati për Kryeprokuror të Shtetit dhe Kryeprokuror duhet të plotësojë kushtet e përgjithshme si në vijim:
 - 1.1. të jetë prokuror me mandat të përhershëm;
 - 1.2. të mos jetë i dënuar për vepër penale, përjashtimisht veprave penale të kryera nga pakujdesia;
 - 1.3. të mos ketë aktakuzë të ngritur, përjashtimisht atyre të ngritura për vepra penale të kryera nga pakujdesia;
 - 1.4. të ketë vlerësim të dalluar apo të mirë të performancës në dy (2) vlerësimet e fundit të rregullta;
 - 1.5. të tregojë dhe dëshmojë integritet të lartë dhe aftësi menaxheriale;
 - 1.6. të mos ketë të shqiptuar masë disiplinore, me përjashtim të qortimit apo vërejtjes jo-publike në pesë (5) vitet e fundit.
2. Përveç kriterëve të parapara në paragrafin 1 të këtij neni për të ushtruar funksionin e

Kryeprokurorit të Shtetit dhe Kryeprokurorit të Prokurorisë, kandidati duhet të plotësojë edhe kriteret e veçanta si në vijim:

2.1. për të ushtruar funksionin si Kryeprokuror i Shtetit, kandidati duhet të jetë prokuror në Zyrën e Kryeprokurorit të Shtetit apo të ketë së paku tetë (8) vite përvojë pune si prokuror i shteti, nga të cilat pesë (5) vite si prokuror në Prokurorinë e Apelit, Prokurorinë Speciale, Departamentin për Krime të Rënda apo Departamentin për të Mitur.

2.2. për ta ushtruar funksionin si Kryeprokuror i Prokurorisë së Apelit, kandidati duhet të jetë prokuror në Prokurorinë e Apelit apo të ketë së paku shtatë (7) vite përvojë pune si prokuror i shtetit, nga të cilat tre (3) vite si prokuror në Departamentin për Krime të Rënda apo Departamentin për të Mitur;

2.3. për të ushtruar funksionin si Kryeprokuror i Prokurorisë Speciale, kandidati duhet të jetë prokuror në Prokurorinë Speciale apo të ketë së paku gjashtë (6) vite përvojë pune si prokuror i shtetit nga të cilat tre (3) vite si prokuror në Departamentin për Krime të Rënda apo Departamentin për të Mitur;

2.4. për të ushtruar funksionin si Kryeprokuror i Prokurorisë Themelore, kandidati duhet të ketë së paku pesë (5) vite përvojë pune si prokuror.

3. Periudha e ushtrimit të funksionit të prokurorit në Prokurorinë Speciale, të caktuar sipas dispozitave të këtij Ligji, llogaritet si përvojë e prokurorit në Departamentin e Krimeve të Rënda në Prokurorinë Themelore.

Neni 29

Kriteret e përgjithshme për Zëvendës-Kryeprokuror të Shtetit dhe Zëvendës-Kryeprokuror

1. Për të ushtruar funksionin e Zëvendës-Kryeprokurorit të Shtetit dhe Zëvendës-Kryeprokurorit kandidati duhet t'i plotësojë këto kushte:

1.1. të jetë prokuror me së paku katër (4) vite përvojë pune në prokurorinë përkatëse;

1.2. të mos ketë aktakuzë të ngritur, përjashtimisht atyre të ngritura për vepra penale të kryera nga pakujdesia;

1.3. të mos jetë i dënuar për vepër penale, përjashtimisht veprave penale të kryera nga pakujdesia;

1.4. të ketë vlerësim pozitiv të performancës në tre (3) vitet e fundit;

1.5. të tregojë dhe dëshmojë integritet të lartë dhe aftësi menaxheriale;

1.6. të mos ketë të shqiptuar masë disiplinore, me përjashtim të qortimit apo vërejtjes jo-publike në pesë (5) vitet e fundit.

Neni 30

Kriteret e përgjithshme për Udhëheqës të Departamentit

1. Për të ushtruar funksionin e Udhëheqësit të Departamentit kandidati duhet t'i plotësojë kushtet si në vijim:

1.1. të ketë së paku katër (4) vite përvojë pune si prokuror;

1.2. të mos ketë aktakuzë të ngritur, përjashtimisht atyre të ngritura për vepra penale

të kryera nga pakujdesia;

1.3. të mos jetë i dënuar për vepër penale, përjashtimisht veprave penale të kryera nga pakujdesia;

1.4. të ketë vlerësim pozitiv të performancës në tre (3) vitet e fundit;

1.5. të tregojë dhe dëshmojë integritet të lartë dhe aftësi menaxheriale;

1.6. të mos ketë të shqiptuar masë disiplinore, me përjashtim të qortimit apo vërejtjes jo-publike në pesë (5) vitet e fundit;

1.7. të ketë qenë i caktuar në periudhë prej së paku dy (2) vite në atë departament.

Neni 31

Mandati i Zëvendës-Kryeprokurorit të Shtetit, Zëvendës-Kryeprokurorit dhe Udhëheqësit të Departamentit

1. Zëvendës-Kryeprokurori i Shtetit zgjedhet nga Këshilli, me propozim të Kryeprokurorit të Shtetit për një mandat katër (4) vjeçar, me mundësi rizgjedhje edhe për një (1) mandat.

2. Zëvendëskryeprokurori zgjidhet nga Këshilli, me propozim të kryeprokurorit përkatës, për një mandat katër (4) vjeçar, me mundësi rizgjedhje edhe për një (1) mandat.

3. Udhëheqësit e departamenteve të përcaktuar me këtë ligj zgjedhen nga Këshilli, në bazë të propozimit të Kryeprokurorit të Prokurorisë përkatëse, për një mandat katër (4) vjeçar, me mundësi rizgjedhje edhe për një (1) mandat.

Neni 32

Përfundimi i mandatit

1. Mandati i Kryeprokurorit të Shtetit dhe Zëvendësit të tij, Kryeprokurorit dhe Zëvendësit të tij dhe Udhëheqësit të Departamentit, përveç në mënyrë të rregullt, përfundon edhe për këto shkaqe:

1.1. dorëheqje;

1.2. shkarkim;

1.3. vdekje;

1.4. arritjen e moshës së pensionimit;

1.5. kur dënohet për vepër penale, përjashtimisht veprave penale të kryera nga pakujdesia.

KAPITULLI VIII

TË DREJTAT, KUFIZIMET DHE IMUNITETI I PROKURORIT TË SHTETIT

Neni 33

Kompensimi i prokurorëve të shtetit

Pagat dhe kompensimet e prokurorëve të shtetit rregullohen sipas legjisllacionit përkatës në fuqi për pagat në sektorin publik.

Neni 34

Pushimet e prokurorëve të shtetit

Pushimi i prokurorëve të shtetit rregullohet në pajtim me Ligjin përkatës të punës.

Neni 35

Trajnimi i prokurorëve të shtetit

1. Prokurorët i nënshtrohen trajnimit profesional të duhur për t'iu mundësuar ushtrimin efektiv të funksioneve të tyre prokuroriale, siç është e përcaktuar nga Këshilli.
2. Kryeprokurori i Shtetit, së bashku me Këshillin, shqyrton programet trajnuese për prokurorët dhe bën përmirësime të nevojshme për të siguruar përshtatjen, efikasitetin dhe dobinë.

Neni 36

Mbrojtja

Prokurorët kanë të drejtë që nga Këshilli të kërkojnë masa të veçanta mbrojtëse për veten dhe për familjet e tyre atëherë kur kërcënimi për jetën e tij apo të një anëtarit të familjes vjen si rezultat i ushtrimit të funksionit të tyre prokurorial apo buron nga ai.

Neni 37

Veprimtaritë profesionale

1. Prokurori me aprovim paraprak të Kryeprokurorit të prokurorisë, ndërsa Kryeprokurorët e prokurorisë, me aprovimin paraprak të Këshillit, kanë të drejtë të marrin pjesë në organizata profesionale, takime shkencore, të cilat promovojnë pavarësinë dhe mbrojtjen e interesave profesionale të prokurorëve.
2. Prokurori me aprovimin e Kryeprokurorit të prokurorisë dhe Kryeprokurorët e prokurorisë me aprovim të Këshillit, vetëm jashtë orarit të punës, marrin pjesë në veprimtari të cilat janë në përputhje me Kodin e Etikës dhe sjelljen profesionale të prokurorëve.
3. Në pajtim me dispozitat e Kodit të Etikës dhe sjelljes profesionale të prokurorëve, prokurorët mund të angazhohen në shkrime profesionale dhe shkencore, por nuk mund të botojnë përmbajtjen relevante të dosjeve prokuroriale gjatë apo pas përfundimit të funksionit prokurorial, përveç nëse kjo lejohet shprehimisht me legjislacionin në fuqi.
4. Prokurorët dhe Kryeprokurorët, për aktivitetet e parapara në këtë nen pranojnë shpërblim, i cili nuk mund të tejkalojë vlerën prej njëzetepesë (25%) për qind të pagës bazë, dhe për këtë shpërblim prokurorët e njoftojnë Kryeprokurorin, kurse Kryeprokurorët e njoftojnë Këshillin.

Neni 38

Sjellja e prokurorëve

1. Prokurorët nuk do të përdorin statusin si prokuror apo reputacionin e prokurorisë për të avancuar të drejtat apo interesat e tyre personale.
2. Prokurorët nuk do të kryejnë asnjë detyrë apo shërbim tjetër që mund të ndërhyjë në pavarësinë dhe paanshmërinë e tyre apo që në ndonjë mënyrë tjetër mund të mos jetë në përputhje me ushtrimin e funksionit të prokurorit.
3. Prokurorët nuk janë pjesëtarë të një subjekti politik dhe as nuk mund të marrin pjesë në çfarëdo lloj veprimtarie politike. Prokurori nuk do të kandidojë, mbajë apo ushtrojë ndonjë funksion politik.

4. Sjellja e prokurorit duhet të jetë në përputhje me dispozitat e përcaktuara në Kodin përkatës të Etikës së Prokurorëve.

Neni 39 Imuniteti

1. Prokurorët gëzojnë imunitet nga ndjekja penale, paditë civile dhe shkarkimi nga funksioni për veprimet e ndërmarra, vendimet e marra, apo mendimet e shprehura që janë brenda fushëveprimit të përgjegjësive të tyre.

2. Prokurorët nuk gëzojnë imunitet dhe mund të shkarkohen nga funksioni nëse kanë kryer shkelje të qëllimshme të ligjit.

3. Kur një prokuror akuzohet apo arrestohet, ai duhet ta njoftojë pa vonesë Kryeprokurorin e Shtetit.

KAPITULLI IX DISPOZITAT KALIMTARE DHE PËRFUNDIMTARE

Neni 40 Nxjerrja e akteve nënligjore

1. Aktet nënligjore të përcaktuara në këtë ligj do të nxirren në afat prej gjashtë (6) muajsh pas hyrjes në fuqi të këtij ligji.

2. Deri në miratimin e akteve nënligjore të përcaktuara me këtë ligj, të gjitha aktet nënligjore të nxjerra nga Këshilli vazhdojnë të zbatohen me kusht që të mos jenë në kundërshtim me dispozitat e këtij ligji.

Neni 41 Shfuqizimi i ligjeve tjera

1. Me hyrjen në fuqi të këtij ligji shfuqizohen këto ligje:

1.1. Ligji Nr. 03/L-225 për Prokurorin e Shtetit;

1.2. Ligji Nr. 05/L-034 për Ndryshimin dhe Plotësimin e Ligjit Nr.03/L-225 për Prokurorin e Shtetit;

1.3. Ligji Nr. 06/L-025 për Ndryshimin dhe Plotësimin e Ligjit Nr.03/L-225 për Prokurorin e Shtetit i ndryshuar dhe plotësuar me Ligjin Nr. 05/L-034.

Neni 42 Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 08/L-167
20 prill 2023**

Shpallur me dekretin Nr. DL-102/2023, datë 12.05.2023 nga Presidentja e Republikës së Kosovës Vjosa Osmani-Sadriu